

大明會典

大明會典卷之二百十一

都察院三

回道考察

正統六年

詔中外風憲係綱紀之司。須慎選識量端弘才行老成者任之。其有不諳事體用心酷刻者。並從都察院堂上官考察降黜。○十四年。令御史差回道。都察院堂上官考其稱否具奏。○成化六年。奏准各處巡按御史俱要親理詞訟。仍將本院遞年發去勘合逐一問結繳報。御史回還備開接管已未完勘合件數具呈本院查考。○七年。

奏准巡按公差御史回京本院堂上官依舊例
查勘考察係結稱職者具奏照舊管事。若有不
稱奏請罷黜○弘治十年奏准各處清軍并巡
按等項御史回京本院考察果有不職事跡及
過違限期者。參奏罷黜○嘉靖十七年

詔巡按御史及兩司守巡官在外擅作威福故違
節年

詔旨訪察官人者。二司官聽巡按御史劾奏。御史
聽都察院考察○二十七年題准巡按御史接
管承行先次御史勘會。要作急勘報。其自己

任內割付者。除滿前兩箇月。待續差御史勘完其餘十箇月內。務要一一勘明銷繳。回道之日。備開已未完數目。造冊呈院。以憑考察。其邊夷等項事體。難於提人行勘者。亦要明白開造。

巡按御史滿日造報冊式

嘉靖十三年定

一薦舉過文武職官若干員。如各官廉勤公謹。俱要指摘所行實事若干件開報。不得用籠通考語塞責。

一禮待過文武職官若干員。凡各官賢能。以何政事獎勵。明白開報。

一糾劾過文武職官若干員。如各官汙濫姦
佞。姦軟等項。俱要指摘所行實事若干件開
報。

一戒飭過文武職官若干員。將各官誤事等
項件數明白開報。

一舉明過孝義節婦若干起。俱要開具查勘
過實事緣由。

一問革過文武職官若干員。凡各官所犯情
罪。俱要開具畧節招由。

一查理過倉庫錢糧若干數。舊管新收開除。

實在逐項明白開報

一提督員學校生員。要將作養過人材。後日堪為世用者。若干名開報

一興革過軍民利病共若干事。如某處興某利。某處除某害。逐一開報

一存恤過孤老若干名口。要將各府州縣收入養濟院見在人數。各廢疾并無依緣由開報

一會審過罪囚若干起。如審允轉詳處決。及辦理過原擬罪名。俱將各犯畧節。招由開報

一問理過輕重罪犯若干起。凡凌遲斬絞徒流杖笞等罪。各計若干名口。具實開報。

一追過賊罰若干數。如還官。入官贖罪。給主等項。逐一明白開報。

一督捕過境內盜賊若干名。凡各府州縣官於某年月日。獲過強竊盜名數。具實開報。

一督修過城濠圩岸塘壩共若干所。要將某官於何年月日。修過某處塘圩等項。明白開報。

一禁約過囑託公事若干起。凡按屬地方有

無挈獲權豪勢要本土刁民。挾制囑託者。具實開報。

一禁約過非法用刑官若干員。凡所屬軍民職官有用非法刑具殘害人命者。除叅問外。仍須指實造報。

一禁約過剋害軍士若干起。凡挈問過所屬管軍官旗人等。剋減月糧。索納月錢等項情弊。逐項開報。

一禁約過倉糧姦弊若干起。凡各府州縣倉廩處所。曾經挈獲包攬侵盜之徒。具實開報。

一禁約過軍民刁訟若干起。所屬地方曾經
拿獲教唆健訟刁徒各誣害過良善事蹟。逐
件開報

一禁約過科害里甲若干起。凡所屬州縣等
衙門官員不體小民貧苦專務奢侈行事。浪
費民財不知節省甚至科取侵用。除拏問外。
仍指實開報

一禁約過罰害軍民若干起。凡所屬官員若
有指稱修理恣意罰害軍民者。除參問外。仍
指實開報

一禁約過淹禁罪囚若干起。凡司府州縣衛所。如有不才官吏。受賄聽囑。及庸闇不能訊決。將輕重囚犯淹禁日久不理者。除參問外。仍指實開報。

一禁約過科差姦弊若干起。凡各府州縣掌印官。派科點差。或有任用姦邪。聽受賄囑。徇私不均者。除參問外。仍指實開報。

一禁約過土豪兇徒害人若干起。凡所屬地方。曾經拏獲兇惡土豪。倚恃族大。或假仕宦勢力。聚衆執持兇器。圍繞房屋。欺行良善。或

至搶檢家財姦淫婦女者。逐事逐名開報。
一禁約過賭博為非若干起。凡所屬地方。曾
經拏獲有等好閒之徒。聚集賭博。因而為非
者。逐起開報。

一禁約過民間奢侈若干事。凡所屬地方。曾
經拏問過婚喪踰禮服合違式。及羣聚宴會
盛張糖卓。繁供筍饌。以奢僭壞民俗者。各逐
起開報。

一完銷過勘合共若干起。要將接管并自奉
各項勘合已未完數目緣由。明白開報。

按察司官造報冊式

冊

一每季終將所屬州縣驛遞等衙門各應付過關文夫馬船隻廩給并錢糧數目備細造報

一每季終將巡按御史并布按二司官巡歷地方有無導從兵快人馬衆多及隨帶官員人等盛設飲食供帳之具以勞州縣等項開報

一每季終將巡按御史并布按二司官各巡歷地方及回省日期開報

一每年終將本司官行過事蹟除薦舉禮待
糾劾戒飭文武職官及舉明孝義完銷勘合
外其餘與巡按御史同者共二十一件備細
開報

一每年終將奉到府部院一應勘合已未完
數目開報

一每年終將所屬府州縣衛所等衙門查盤
過各倉積貯稻穀多寡數目造報

一每年終將各衙門見役吏典備細脚色并
問革過吏役招由造冊備考

一每年以將所屬地方已未獲盜賊數目開報

一每年終將間過充軍犯人姓名鄉貫要緊畧節招由編發過衛分起程日期造冊奏繳

一每年終將所屬地方疏通過水利緣由造冊申報

一每年終將追解過贓物數目備造奏報

問擬刑名

洪武二十六年定。凡鼓下。或通政司發下告人連狀到院。責令供狀明白。保管聽候。照出狀內

被告人數入流官員具呈本院奏聞提取。其軍民人等給批差人提取對理招供明白。取訖服辯無招干連隨即保管聽候。有罪人數牢固監候。追徵所招贓仗完足。責令庫子收貯。議擬罪名開寫原發事由。問擬招罪。照行事理。徒流遷徙死罪充軍人數具寫奏本。笞杖以下止具牒文。僉押完備。連囚赴堂。備說所犯情節罪名。審無異詞。然後入遞。將囚押送大理寺審錄。候平允回報。若罪名不當。駁回再問。仍將所駁招罪參詳明白。再擬改正。或有審異。則監收聽候調

別衙門再問其餘審允人數除笞杖徒流徒罪
准工囚人備開年甲工址畧節招罪工役限期
呈堂編發工役的決笞杖人數書寫斷單開具
合得罪名會請刑部等官公同斷決取完僉批
單入卷其充軍囚人具手本送編軍御史處照
地方編發取收管附卷絞斬死罪仍令司獄司
轉送重囚監牢固枷收聽候大理寺依時覆奏
回報具手本會請刑部等官公同處決仍取決
訖月日批單附卷無招踈放并笞杖的決還職
著役寧家人數另具公文差人管送各該衙門

給憑發回。取批收附卷。原收贓仗。候季終通類具呈本院。出給長單。差委御史解赴

內府該庫交納足備。取獲庫收附卷。如有追無見贓囚人。責供明白。類行原籍追徵。及照出合問人數。隨即呈提。前項審過囚人。設有病故。請官相視明白。取獲批單附卷。若干係重囚。牒報大理寺知會。候本宗事完。通具結絕緣由。呈堂照驗。餘與刑部同○正統四年定。凡監察御史按察司官。追問輕重刑名。中間果有律令該載不盡者。比擬律條。開具請

旨○凡各道每月以問過輕重罪囚自月初起至月
終止將已未發落實在數目各若干具呈本院
轉具揭帖開報刑科查照

追問盜事

傳究盜

洪武二十六年定凡在外軍民人等赴京或擊
登聞鼓或通政司投狀陳告一應不公冤枉等
事

欽差監察御史出巡追問照出合問流品官員就便
請

旨拏問帶同原告一到追問處所著令原告供報被

告干連人姓名住址立案。令所在官司抄案提人。案驗後。仍要抄行該吏書名畫字。如後呈解。原提被告人到。不許停滯。即於未解內立案。將原被告當官引問。取訖招供。服辯判押入卷。明立文案。開具原發事由。問擬招罪。照行事理。除無招。笞杖輕罪。就彼摘斷。徒流死罪。連人卷帶回審擬。奏聞發落。

正統四年定。凡監察御史按察司官。追問公事。中間如有讐嫌之人。並聽移文陳說迴避。若懷私按問。敢有違枉者。於反坐上。加二等科罪。所

問雖實亦以不應科斷○凡監察御史按察司
官有追問諸衙門官員取受不公刑名等事除
軍官京官并勲舊之臣及在外文職五品以上
官員奏請

旨方許取問其餘六品以下取問明白從公決斷之
後仍具奏聞若奉

特旨委問者須將始終緣由議罪回奏取自

上裁○凡有告爭戶婚田土錢糧鬪訟等事須於本
管衙門自下而上陳告歸問如理斷不公或冤
抑不理者直隸赴巡按監察御史各省赴按察

司。或分巡。及巡按監察御史處陳告。即與受理推問。如果得實。將原問官吏。依律究治。其應請旨者。具實奏聞。若見問未經結絕。又赴本管上司告理。不許輒便受狀追奪。變易是非。須要即時附簿發下原問官司。立限歸結。如斷理不當。及應合歸結而不歸結者。即便究問。違者監察御史按察司體察究治。如不係分巡時月。及巡歷已過。所按地面。却有陳告官吏不公不法者。隨即受理追問。○凡風憲官問定官員職罪。如有冤屈。許本犯從實聲訴。若果真犯實跡。不肯伏罪。

或捏造挾讐等項為詞。撫入原問者。於本犯上加二等科罪。仍押至

午門前聽候再審

審錄罪因

審決

天順二年。令每年霜降後。本院以各道問擬該決重囚具奏。引赴

承天門外會官審錄。弘治七年。令凡捕獲強盜。鄉赴

御前引奏者。本院同刑部。大理寺。錦衣衛堂上官。於午門前會問。○九年。令每年天氣炎熱之時。本院

與刑部大理寺奉

勅審錄見監罪囚○嘉靖四十五年題准五年大

審獄囚河南道掌道御史亦與審

以上在內罪囚

洪武十四年差監察御史分按各道罪囚凡罪

重者悉送京師○二十四年差刑部官及監察

御史清審天下獄訟○二十六年定凡在外布

政司按察司都司并直隸府州刑名有犯死罪

囚人收監在彼止開招罪申達合干上司詳議

允當移文本院通類具奏點差監察御史會同

刑部委官按臨審決其到所在官司隨即令首

領官吏抄案各該衙門追吊原行人卷赴官叅
詳招罪果無出入及審訊犯人服辯無異就令
所司抄案差委獄卒將犯人押赴法場各照原
擬處決將原吊卷宗發還各衙門收照却行具
本開坐決過犯人花名回奏仍呈原委官司知
會若囚人番異原招即合辦理重提一千人證
到官從公對問明白帶回審錄發落其原問官
吏果有受賊出入人罪情弊通行具奏鞫問○
永樂元年令各布政司死罪重囚至百人以上
者差御史審決○宣德八年

諭法司。天下重囚。遣的當官。分臨各處。公同巡按御史。詳審處決。○正統四年。令凡各都司。布政司。所屬并直隸府州縣。軍民諸衙門。應有罪囚。追問完備杖罪以下。依律決斷。徒流死罪。議擬備申。上司詳審。直隸聽刑部。巡按監察御史。在外聽按察司并分司。審錄無異。徒流罪名。就便斷遣。至死罪者。議擬奏聞。事內干連人數。先行摘斷。不須對問者。發落寧家。必合存留待對者。知在聽候。直隸去處。從刑部委官。與巡按御史。在外從都司。布政司。按察司。及巡按御史。公同

審錄處決。如番異原招。事有寃抑者。即與從公
辦理。若果寃抑。并將原問審官吏按問。其應請
旨者。奏聞區處。若審錄無異。故延不决。及明稱寃枉
不與申理者。並依律罪之。○嘉靖二十七年題
准。巡按御史。遇有囚犯。應辯正者。務要虛心審
處。勿以審錄官有行。自分彼此。干礙原問官員
一體舉究。仍將辯正過人犯起數。奏行本院查
考。○又題准。巡按御史。于審錄官。奏審過於疑
等項罪囚。責令所在官司類報。於疑發遣者。於
何日起解。釋放寧家者。於何日發落。駁回再問。

者於何日結勘。備達刑部查考。如有偏執阻撓。擅為更改。又因審錄官駁回。凌虐致死者。刑部指實。參奏治罪。以上在外罪四

監禮糾儀

凡朔望日。

皇極殿朝參。丹墀。

皇極門外。各侍班二員。每日常朝。丹墀。

午門外。各侍班二員。

凡賀。

萬壽聖節。正旦冬至。

皇極殿行禮。殿上侍班四員。丹墀十二員。賀。

大祀禮成。而立。

皇后。

東宮。殿上。丹墀。各侍班二員。賀。

聖駕視學還。

皇極門行禮。丹墀侍班二員。

凡頒

詔。殿上侍班四員。丹墀。

午門外。

承天門外。各二員。

登極頒詔殿上侍班四員。丹墀十二員。

午門外。

承天門外各二員。

凡冊立

東宮傳

制殿上侍班四員。丹墀十二員。

午門外。

承天門外各二員。

大祀誓戒及一應傳

制殿上。丹墀各侍班二員。

凡祭

郊

廟

社稷。

神祇。

諸陵歷代帝王先師孔子俱監禮二員。

聖駕幸學行釋奠禮監禮四員

凡慶成宴殿上侍班二員。丹墀糾儀四員

凡

經筵侍班二員

凡冬夏至

大祀齋戒點齋二十四員

凡敕護日月食糾儀六員

凡賀

皇太子。

文華殿行禮。殿上門外各侍班二員

凡

皇子行冠禮。殿上丹墀各侍班二員

凡祭酒等官率諸生上表謝

聖駕視學。狀元率諸進士上表謝

恩及進春進曆殿上丹墀俱各侍班二員進

實錄殿上侍班四員丹墀十二員

凡大朝會行禮若有失儀聽糾儀御史舉劾常朝大小衙門官員奏事理有未當及失儀者聽侍班御史并給事中劾奏依律罰俸

凡朝會行禮敢有攙越班次言語誼譁有失禮儀及不具服者隨即糾問

凡大小祭祀敢有臨事不恭牲幣不潔褻瀆神明有乖典禮失於舉行及刑餘疾病之人陪祭執事者隨即糾劾

凡祭

郊社

宗廟山川等神。若有怠於執事及失儀者。並聽糾儀御史舉劾。依律責罰。

凡早朝遇雨雪。司禮監傳

旨。有事進。無事退。有事者即從東西廊行。

皇極門上東西對立。糾儀御史序班俱北向立。

凡京堂四品官員失儀。照三品事例。具本初奏。近題准翰林學士亦不

面糾

嘉靖通例

嘉靖元年。令各處守巡官務照分管地方。及舊定限期。躬親巡歷。著實幹事。撫按官亦要正身率下。禁止迎送。嚴加督察。○十一年題准。凡各衙門奉到撫按及公差都御史。一應批詞牌案內。有充軍徒罪及口外為民者。如一事而彼此相干。其定發以原行衙門在先為主。若事起於所司。通行申呈合于上司者。俱候巡撫定發。無巡撫處。巡按御史定發。所司須將各奉到先後緣由。及通行申呈字語。開具明白。以便批荅。中

間有應該駁行。仍各據理而行。若奉奏行。及奉欽依者。其允詳定發。俱歸於

欽奉衙門。○凡徭役。里甲。錢糧。驛傳。倉廩。城池。堡隘。兵馬。軍餉。及審編。大戶。糧長。民壯。快手。等項。地方之事。俱聽巡撫處置。都布按三司。將處置緣由。備呈巡按知會。巡按御史出巡。據其已行之事。查考得失。糾正姦弊。不必另出。已見多立法例。其文科武舉。處決重辟。審錄寃刑。叅撥吏農。紀驗功賞。係御史獨專者。巡撫亦不得干預。○凡撫按遇有地方大事。皆會同而行。如常行事。

務與委署印信止以文書先到者為主奉行官
吏不必觀望兩請○凡考選軍政中間有係邊
關班操者中差御史不得指以職業干預撫按
職掌軍政所定官員中差御史有行止可暫委
或行帶管不許更改取用空閒在衛者不拘其
公差都御史御史職務各奉有專

勅一應興革區處事宜撫按官亦毋得干預○凡
巡按御史不許同巡撫報捷如無巡撫聽總兵
領兵官奏報巡按止是紀驗功次以明賞罰其
浙江福建舊無巡撫與有巡撫而偶缺者一應

事務與巡按處置。如撫按官一時俱缺。聽中差御史綜理。○凡在外撫按官相接。巡撫望巡按到儀門下轎馬。巡按迎至後堂。巡撫坐上席。巡按前席隅坐。巡按望巡撫前門下馬。由偏門而入。巡按隅坐。巡撫坐前席。如遇會勘公事。巡撫正面居中坐。巡按正面隅坐。習儀拜

牌。祭丁。及迎接

詔勅等項。巡撫居左。巡按居右。巡按仍讓巡撫於前。其巡按與提學中差御史相接。如常處。照依進道先後次序。公會須讓巡按。○凡死刑。各府

州縣等衙門自問。及奉撫按批行者。俱申呈撫。按照詳。仍監候會審。如各道自行批行者。不必呈詳。撫按止候會審。其奉撫按批行者。照舊呈詳。都司衛所。與府州縣事體同。○凡遇災傷之年。撫按官先督行各府州縣。及早申報。巡按即行委官。分投覈定分數。行所司造報。巡撫具奏議免。如無巡撫。巡按奏報。○凡賑濟專責巡撫。會同司府州縣等官。備查倉廩盈縮。酌量災傷重輕。應時搏節給散。巡按毋得准行。如賑濟失策。聽巡按糾舉。○十二年奏准。凡巡按御史在

外接待巡撫。不論副都僉都。其坐旁坐。其班後列。不遜者回道之日。考以不諳憲體。奏請降調。○十四年奏准。江南蘇松常鎮四府地方兵備衙門。凡一應事宜。原係撫按并巡江操江巡鹽等衙門有行者。止申詳原行衙門定奪。其係兵備衙門。自己所行地方人命強竊盜賊等事。衆詳合律。即便允發監候。巡按御史會審轉詳。其餘衙門。不必再行申請。其所屬各府州縣等衙門一應事情。於撫按巡江巡鹽操江有行者。申呈定奪。與各衙門無行者。亦止申呈兵備衙門。

詳允○二十七年題准。撫按官巡歷一處事完。更歷一處。即令官員俱回任辦事。不許任意隨帶。如有承委未結者。省令速結。具文回報。其或越境迎送。即行舉問。有司官恃才妄作害政者。尤要悉心查訪。逐一究正○又題准。撫按官於各所屬務在平時加意咨訪。務求其實。如有誘迫生員里老人等。妄稱賢能。投遞保狀者。嚴行禁革。計令姦民鼓衆建祠者。即將祠像拆毀。干問人員。如法究問○隆慶元年題准。撫按等官嚴禁所屬。不許擅撥長夫長馬。及差遣官吏。越

境迎送。其修置衙宇家火等項。各照衙門酌立規則。於應動官銀內取辦。不得科歛里甲。凡所屬佐貳。不許擅受一詞。及私出牌票。以滋騷擾。掌印官。置簿查考。○又題准。撫按并公差大小官員。保獎屬官。不許行謝禮。與者受者。俱坐贓論。○凡風憲官。行事務要慎重。不得輕變舊制。為地方之擾。其有法久弊生。利少害多。果不便於民者。必須撫按斟酌會議。務求上下相安。遠邇稱便。方許施行。○凡撫按官。動用錢糧。互相覺察。如用銀一百兩以上。及派用軍需。例應查

覈如事在從容則先期商訂會案施行。若事機不便則完日具數通呈知會。其餘一應公費出入。一體互報。至於存問私禮通行禁革。○二年題准。巡按出巡查盤。不必會同巡撫。其事關撫按兩院者。仍照例委官會案發落。南北直隸各差御史。凡事體干係本衙門者。委官一體申呈。從一歸結。不得另行分委。以滋煩擾。○又題准。凡奉有

欽依勘合。如查勘功罪提問官員等項。務要上緊完報。若查係司道等官有所規避。或納賄不行。速

理者撫按等官指名叅究。如應勘應問官員。或
屢提不出。及勢要囑託。故意抗違者。許叅奏拏
問。如事干重大。巡撫不依期完報。許科道官查
叅。巡按不依期完報。回道之日。本院查叅。凡
撫按及公差內外官員。各遵照宣德四年

新諭。遇有事務。不許輒差。都布按三司及軍衛府
州縣正官掌印官幹辦。○又題准。撫按官舉劾
不得任意輕重。自相矛盾。已提問者。不得止論
罷官。已降調者。不得再論。不及據實分別。有不
合格例。輕重失倫者。治罪。

南京都察院

凡本院問擬刑名審錄取決重囚及提問職官等項俱與南京刑部同

凡南京各衙門考滿郎中等官本院發河南道考覈牒送南京吏部該司覆考停俸赴京給由凡兵馬司兵馬考滿先赴兵部考覈咨送本院行河南道考

凡六年一次會同南京吏部考察南京五品以下官員與都察院同

凡操江官軍本院副都御史或僉都御史一員

奉

勅提督并巡視九江至鎮江蘇松等處江道沿江
軍衛有司盜賊之事皆屬焉。成化九年奏准專
督巡江後復令兼督操江官軍。○嘉靖十三年
題准沿江軍衛除浦子口原無水軍外其九江
安慶儀真鎮江太倉松江等處各照地方大小
造船置器選熟知水利兵快委官統領操演防
守。○又議准長江上下往來船隻數多中間鹽
徒賊盜混雜難辨通行操江巡撫及九江蕪湖
龍江各鈔關抽公部屬安慶儀真守備等官并

各通接江洋省分各府州縣官司。但遇經過船隻。俱要灣泊投引查驗。仍各置船隻差撥兵快巡邏。○又題准巡江衙門定委各府同知兼管巡捕。統率壯快常川操守。遇警會同該衛官軍緝捕。不許別項衙門差委。○又題准沿江巡檢司弓兵。各該府州縣查點舊額。僉補原設巡哨船隻。若有損壞缺少。於巡江衙門贓罰銀內。動支打造。給兵領駕。以備勦捕。○二十三年奏准沿江地方。除授府州縣同知縣丞。文憑內明註管理巡捕字樣。令專聽操巡衙門節制。

凡各道御史糾劾言事與北道同如遇清軍刷
卷北道員少聽都察院定擬奏差

凡奏差各道御史清軍刷卷巡江管屯巡倉等
項成化十七年題准各給印信在京對道御史
關領差人給付事完復

命進繳

凡巡上下江舊差御史二員一員自龍江關上
至九江一員自龍江關下至蘇松等處嘉靖七
年題准兼督安慶儀真揚州淮安軍衛有司擒
捕鹽徒○十一年奏准巡視上江御史駐劄安

慶下江御史駐劄鎮江奉

勅接管行事○隆慶三年令巡江御史清理沿江
一帶蘆洲○萬曆四年令巡視上江御史督理
應天太平安慶池州寧國五府廣德州漕糧并
京庫錢糧

凡監收鳳陽糧斛差御史一員正統二年令兼
理鳳陽中等九衛所并鳳陽府等軍民詞訟○
正德二年令兼捕盜○嘉靖四年奏准奉

勅往來查催直隸河南等處起運鳳陽蘆滁等府
州軍餉○二十四年奏准帶管湖廣黃州府額

解安慶府倉糧萬曆三年歸併屯田御史兼管
凡巡視屯田差御史一員。成化四年奏准專理
江北四十二衛屯田。遇有詞訟應叅奏者備呈
總督糧儲都御史具奏處分。○正德二年奏准
兼捕盜賊。○十五年議准。凡遇災傷年分先期
遍歷屯所勘定分數。依限奏免。○嘉靖八年題
准。以年淺御史奏差。二年滿日。方許更替。○十
一年題准。兼督錦衣衛及直隸廬鳳淮揚安慶
滁徐等衛屯田。照北直隸事例。督同徐潁兵備
二道嚴令所屬官耕種徵納。如有侵佔違限拖

欠及誤事不職者各照律例究治。年終具徵解數目奏繳。青冊送部查考。○隆慶三年。令兼管南直隸印馬事務。

凡巡江巡倉等御史。嘉靖二十七年題准受理詞訟。查盤倉庫。審問囚犯。禁革姦弊等項。於本差事有干涉者。悉遵照。

勅諭內事例施行。如不係本差事務。悉聽巡按御史遵照。憲綱處分。不得干預。其遇有地方重大事情。巡按御史與各專差御史俱有干涉者。仍要協和行事。不許自分彼此。致誤事機。仍行所

屬如事應會處者通行申呈。其各有專差者。不必聚行呈請。

凡南京錦衣等衛烏龍潭等倉場舊有提督南京糧儲都御史一員及御史二員分差監收草場糧草。及巡視各倉。隆慶四年。裁革都御史。令南京戶部侍郎帶管提督。仍差御史一員巡視。凡蘇松常鎮等處水利。及高寶湖隄。萬曆三年。奏准專差御史一員管理。三年滿日更替。仍兼管巡視下江。

凡照刷南京光祿寺及南京

內府庫文卷給散京衛旗軍冬夏布疋各差御史
一員事完復

命嘉靖四年奏准免復

命止會同該部該科造冊奏繳

凡監收南京

內府各庫布絹點閱

皇城門禁比驗兵仗局軍器驗收太常寺犧牲所

牛羊差御史一員

凡清查後湖黃冊洪武二十四年差御史二員
同戶科給事中一員戶部主事四員督率監生

比對。如有戶口。田糧軍匠埋沒差錯等項。造冊
奏。奏問罪改正。事完復

命

凡巡視各衙門人匠。存恤各衛新軍。監收庫房
店舍等項鈔課。看裝馬快船隻及石灰山關清
水潭。秤掣商鹽。各差御史。或不妨道事。暫委監
視

凡監收龍江等關。抽分竹木。差御史一員。兼督
江東宣課司。抽分豬羊等項

凡巡城兼巡街道。正統間。差御史一員。○弘治

五年奏准差二員。員管中。南東。二兵馬司。一員管西。北。二兵馬司地方。○十四年題准南京權要家人。承攬各處官解織造進用段疋。強分機戶銀兩者。聽巡城御史拏問。權要故縱。及占恠者。指實參奏。

凡南京各衛所軍士差御史一員同兵科給事中一員兵部武庫司主事一員清查姦弊。成化八年奏准。三年一差。

凡南京各營騎操馬匹下場牧放。弘治十八年題准。差御史一員不時點閱。

凡南京京營每年題差御史一員管理年終分別將領舉劾

凡南京各教場操練官軍差御史一員點閱

凡南京十三門官軍正德十二年差御史二員點閱不妨道事

凡南京府部院寺等衙門收受俸米銀兩嘉靖八年題准差御史一員會同給事中一員監收督察

凡

聖節正旦冬至。

千秋節各衙門先期進表箋。至期習儀行慶賀禮。
及迎接

詔書開讀。俱差御史二員糾儀

凡祭

孝陵及歷代帝王廟先師孔子。入江之神俱差御史

二員監禮

凡應天府鄉試差御史二員監試。隆慶元年添
委御史二員搜檢

大明會典卷之二百十一

大明會典卷之二百十二

通政使司
中書舍人

通政使司

洪武三年。初置察言司。設司令堂。受四方章奏。尋革。十年。始置通政使司。正三品衙門。設通政使。左右通政。左右叅議。經歷司。經歷。知事。職專出納。

帝命。通達下情。肅防諸司出入公文。奏報四方章奏。實封建言。陳情伸訴。及軍情聲息。災異等事。成化二年。增設膳黃右通政。列銜本司。不與司事。

今革

聖諭

洪武十四年令本司職專出納與內外諸司俱無文移有徑行本司者以違制論○二十六年定凡有

帝命必當詳審覆奏允當然後施行

聖諭

洪武二十六年定凡有四方陳情建言伸訴冤枉民間疾苦善惡等事知必隨即奏聞及告不公不法等事重者於底簿內謄寫所告緣由齎狀奏聞仍將所奉

旨意於上批寫送該科給事中。轉令該衙門抄行常事者另置底簿。將文狀編號。用使關防。明立前件。連人狀送當該衙門整理。月終奏繳底簿送該科督併奉行。該衙門回銷。○永樂四年。令本司奏事雖小必聞。

凡每日早朝。引奏天下臣民。及入遞所奏事。或五事七事。遇大寒大暑。減免奏數不一。

開指實封

凡天下臣民實封入遞。或人齎到司。須於公廳。眼同開拆。仔細檢看。事干軍情機密。調撥軍馬。

及外國來降進貢方物急缺官員提問軍職有
司官員并請

旨定奪事務。即於底簿內謄寫畧節緣由。當將原來
實封。

御前陳奏畢。就於奏本後批寫

旨意送該科給事中收轉。令該衙門抄出施行。其進
繳稅糧文冊勘合通關起解軍囚等項。附簿明
白。止送該科收。不必入奏。

凡邊方腹裏盜賊機密重情。正德六年奏准各
處撫按官題奏到司。隨即封進。不許遲留。副本

亦要道本封實。咨呈等文免掛號待事已施行
方許開拆附卷各該奉行衙門俱要慎密關防
如有漏泄一體治罪○嘉靖十二年令凡內外
奏報軍機并兵部議處賊情不拘齊戒日期照
常封進

凡題本奏本嘉靖八年題准照原定長短廣狹
格式刊印頒降令內外臣民遵守不許違越奏
本字樣務與題本大畧相似毋得細小違者本
司叅駁治罪

凡在京大小衙門但係奏本不分公事私事并

在外守備等項內臣陳情已事。巡撫都御史巡按等項御史總兵副參及分守守備備倭等項武職宣慰宣撫招討等司及府州縣等衙門。一應錢糧軍馬刑名乞

恩認罪繳

勅等項本冊俱赴本司投進。嘉靖八年題准有徑自封進者本司參駁治罪

凡軍民人等奏告詞訟。本司參詳除謀逆機密重情無主人命全家被人殘害侵欺係官錢糧偽造寶鈔私鑄銅錢并干已事情外。中間看係

革前并不干已事。及審出添捏等項虛情。例不該奏告。就于本後明白。參出抄送法司。該道再加詳審。立案不行。嘉靖八年題准。有殊語太長。浮詞太多。及一應違錯不敬者。本司參駁治罪。凡內外各衙門。一應公事。用題本。其雖係公事。而循例奏報。奏賀若乞

恩認罪繳

勅謝

恩并軍民人等陳情建言。伸訴等事。俱用奏本。嘉靖十八年定。

皇太子監國。用啓本。奏題皆曰啓。伏候

勅旨。曰

令旨

關防公文勘合

洪武二十六年。定本司置立出入文簿。令各房
令典分掌。內外衙門。公文到司。必須辨驗。允當
隨即於簿內編號。註寫某衙門行某處爲某事。
公文用日照之記。勘合用驗正之記。關防畢。令
鋪兵於文簿內書名畫字遞送。若行移不當。及
違式差錯。洗補互相推調等項。事重者入奏區

處常事照依

欽定事例。在外貼送當該衙門。如律在京衙門。退回改正。將發過公文。并差錯件數。月終類奏。文簿繳進。若各處公文。事干軍情災異機密重事。隨即入奏。送該科給事中收。如呈稟五府六部都察院等衙門公文緊要者入奏。仍用

欽降勘合。用使本衙門印信。云寫

旨意貼送當該衙門。覆奏施行。若誤遞到有施行者。奏訖亦貼送當該衙門。無施行者亦入奏。送該科給事中收照。○宣德四年。令在京諸司行移

在外三司軍衛府州縣催辦事務悉聽本衙門自行分管辦理有輒差掌印正官及坐名差官者通政司糾舉處以重罪



凡本司發過五府六部都察院及內外諸司衙門公文并照駁各衙門差錯公文實封等件及行移勘合原告文狀拏人起數給由人員每月類奏。年終通行類數開奏

凡每月終五府等衙門出入公文等項數目而奏送科外。其給由起復官員仍奏令吏部查理

凡天下府州縣奏到本年兩澤。本年終

面奏。類送戶科。

萬曆六年事

凡本司日逐收下奏本夾板。年終

面奏。令錦衣衛差人。運送司禮監交收。

凡大司合用紙劄。於刑部見收囚人紙劄內關
用。印色等項。原從順天府買用。後奏准。於刑部
支給官錢買用。今仍於順天府關用。

凡

今官會議大事。會問大獄。秋後審錄重囚。及會推文

職大臣總兵官本司官皆預

凡六科中書舍人行移各衙門俱經本司轉行
凡尚寶司六科中書舍人官員俸糧俱從本司
帶支今自行關支

南京通政使司

凡南京軍民人等陳告狀詞置立底簿將狀編
號用使關防明立前件連人狀送各該衙門整
理弘治十三年奏准南京詞訟干係地方者許
內外守備官員受理其餘一應詞訟悉遵舊制
赴南京通政司告送法司問理其在外軍衛有

司。不係掌印官。不許受詞訟。

凡南京各衙門公文出入。俱赴本司掛號。

凡每月朔望日。各衙門堂上官會議。本司掌印官預。

凡每歲秋後。法司會各衙門官審錄重囚。本司掌印官預。

凡南京六科中書舍人。行移各衙門。俱從本司轉行。

凡南京尚寶司六科中書舍人俸糧。俱於本司帶支。

中書舍人

國初中書省設直省舍人。從八品。洪武九年。改中書舍人。正七品。後中書省革。更定為從七品。職專書寫。

詔勅冊符鐵券等事。共額設二十員。無正副。例推年深者一人掌印。其恩蔭帶俸及

文華

武英東西二房。

內閣

誥勅

制勅二房分直者無常員。

文華殿門東房別設中書舍人分直職專奉
旨書寫書籍等項。

武英殿門西房別設中書舍人分直職專奉

旨寫篆

冊寶圖書等項。

凡

親王之國。

勅符事號赴

內閣繕寫其底簿付印綬監照收

凡

親王。

郡王。升妃。初授封號。合授金冊銀兩。俱從銀作局造冊文寫完。仍送本局鐫刻。

凡

王府自

郡王以下。至奉國中尉自

王夫人以下。至鄉君及儀賓合給

誥命。公侯駙馬伯。內文武官及蕃王土官合給誥勅命。俱從該部奏准送寫。

凡公侯伯初授封爵。合給鐵券。從工部造完。送寫。

誥文。并券陰則例畢。轉送銀作局。鐫刻填金。仍領回。以右一面頒給。左一面年終奏送。古今通集庫收貯。

凡内外文武官應給

誥勅。俱於翰林院領寫。其新製武官

誥命。自有織定誥文。請誥。續誥。俱從兵部徑自送

黃填寫

凡

詔勅軸。俱南京織染局織造。齎送工部。轉送印綬監。會同掌印官。檢選收貯。或不堪用。仍會同參奏。

凡

王府詔軸。舊製。

王雲龍。

王夫人雲鳳。軸嵌七寶。後

親郡王俱用。惟

親郡王生母封夫人者。仍給

詔命如舊製。鎮國將軍及夫人。用玉軸。輔國將軍

及夫人。犀軸。奉國將軍及淑人。鎮國中尉及恭人。俱金軸。輔國中尉及宜人。奉國中尉及安人。俱角軸。郡主及郡主儀賓犀軸。縣主及縣主儀賓郡君及郡君儀賓俱金軸。縣君及縣君儀賓鄉君及鄉君儀賓俱角軸。

凡文武官

話勅軸。舊製官一品雲鶴錦夫人。雲鸞錦俱玉軸。二品獅子夫人。鸛鷀俱犀軸。三品四品瑞荷淑人恭人芙蓉俱金軸。五品瑞草宜人。四季花俱角軸。六品七品安人孺人俱葵花烏木軸。及八

品九品官同。文用玉箸篆。武用柳葉篆。品級花樣引首同。新製武官誥軸。一品至七品俱鎧甲葵花引首。棘金軸。仍用柳葉篆文。今兼用之。凡該用。

誥勅軸俱於

御前奏過。將原領印綬監勘合號紙。備細填寫各該給。

誥勅職名流品軸數。繳進該監比對登記內號底簿。照數領用。其號紙文官并

王府蕃王。土官與武職舊製俱用智字號。武官新

製用仁字號

凡寫

詔勅。成化二十三年奉

旨。照奏准年月填寫

凡寫完

詔勅軸類編勘合底簿。公侯伯。內外文武官舊用二十八宿。後更定。公侯伯本身并追封用仁義禮智字。蕃王及文官一品二品本身同。三品以下用十二支字。追封用文行忠信等字。武官新製續詔用千字文。請詔仍用二十八宿。永樂以

後請誥用急就章。蠻夷土官各從文武類編。每字編滿一千道。仍從前續編。若

王府并駙馬都尉俱不編號。其底簿。

王府及儀賓共一扇。駙馬都尉蕃王土官各一扇。公侯伯共一扇。文官一品二品各一扇。三品至五品共一扇。六品至九品共一扇。武官請誥續誥各一扇。外官品級雖與京官相同。俱列于後。用寶完備。收候每年終於

御前奏過。送古今通集庫收貯。

凡編完

誥勅軸會同該部該司該科官與尚寶司官於
皇極門用寶訖仍領回收貯候該部請

旨頒給

凡吏部兵部奏過應該拘收追奪

誥勅俱會掌印官收貯燒燬仍於勘合底簿內明

白開註

凡頒

賜文武官扇從司禮監辦完送寫

凡大祀

天地分官二員隨

駕供事

凡

萬壽聖節。正旦冬至及傳

制傳臚等項。分官四員掌

皇極殿侍班

凡

東宮千秋令節。并正旦冬至及分官二員於

文華殿侍班

凡冊封

宗室例充副使

凡會試。委官一員與

制勅房官。收掌試卷

凡武舉。正德十三年題准。委官一員與兵部屬
官收掌試卷

凡寫武官

誥勅并謄黃監生舊用八十名。後定為四十名。俱
從兵部送用。天順八年。令會同兵部堂上官選
取。成化十三年題准。以二十五名寫誥。十五名
轉送通政司謄黃

凡行移各衙門俱從通政司轉行

凡各官俸通政司關支。今自行關支。監生月糧兵部關支。

凡每日各官并監生酒飯俱光祿寺供給。

凡寫

誥勅合用紙劄筆墨具奏於司禮監關支。其武官誥勅合用紙劄筆墨該兵部具奏行順天府買用。凡裱裝用。

寶勘合底簿等項合用裱背等匠八名。工部每季差撥應用。

南京中書舍人

後不設

大明會典卷之二百十二